

SEFANIA

Iehova ena badu dinana

¹ Iehova ena hereva Sefania enai e kau, Iosia Amon, Iuda pavapavana, ena nega ai. Hari Sefania na Kusi natuna; Kusi na Gedalia natuna, Gedalia na Amaria natuna, Amaria na Hesekia natuna.

² Iehova na e tomu:

Gau iboudiai baina darodia oho vaitani
tanobada kopina amo.

³ Taunimanima bona uda ġaudia baina darodia
oho,
bona atai manudia bona davara gwarumedia
danu.

Iehova na e tomu:

Kara dika taudia na baina tahodia dobi,
taunimanima iboudiai baina negedia daure,
tanobada kopina amo.

⁴ Lau ese imagu baina toia roro, Iuda ihadikana
totona,
bona Jerusalem inoholaina taudia iboudiai
ihadikadia totona.

Ina gabu amo Baal oreana kwabukwabudia baina
negedia daure,
bona kaivakuku edia hahelaġa taudia ladadia
baina rohodia:

⁵ ruma guhidia ai e igo dihomu guba hisiudia e
toma henidia dihomu taudia,

bona e igo dihomu Iehova ladana ai e gwau
 hamatamu a Milkom ladana ai danu e gwau
 hamatamu taudia,*

⁶ bona Iehova igavana amo vada e raka muri,
 Iehova asie tahuamu bona enai asie
 henanadaimu, taudia.

⁷ Gaubada Iehova vairanai asi reğereğemui ba noho;
 badina be Iehova ena dina vada eme
 kahikahi.

Iehova ese boubou ġauna vada e hahegaegaea,
 bona e vavea taudia na vada e hahelaġadie.

⁸ Iehova ese ena boubou ġauna baine hahelaġaia
 dinana ai,
 lau ese heitatao taudia bona hanua pavapa-
 vana natuna mamaruanedia baina hadava
 henidia,
 bona idau bese dabuadia e hahedokilaimu
 taudia iboudiae danu.

⁹ Una dina ai rumu raka-vareaina e rohoa
 hanaimu taudia iboudiae,
 bona biagudia edia rumu na daġedaġe bona
 koikoi karadia ai e hahonudiamu taudia
 iboudiae,
 baina hadava henidia.

¹⁰ Iehova na e tomu: Una dina ai
 taitai na Gwarume Ikoukouna amo baine dae,
 bona tai lolololo na Hanua Matamatana amo,
 bona rege badana na ororo amo.

¹¹ Raro-kaka kourana inoholaina taumui e, a tai
 lolololo!

* ^{1:5} Kanaan taudia gunadia edia dirava ladadia e hato “Baal”; Asuria taudia ese guba hisiudia e toma henidia diho; Amono taudia edia dirava badana ladana na Milkom.

Badina be hoihoi taudia iboudiai na lasihadia;
*silver e hahetohoamu taudia iboudiai vada
 eme henegē daure.*

¹² Una negana ai lau ese lamepa baina abi kau,
 Ierusalem ai baina hetahu;
 bena noho-herekwa taudia,
 lalodia ai e tomu
 “Iehova basine hahenamo bona basine hahedika”
 taudia,
 baina hadava henidia.

¹³ Edia kohu na haida ese bae dadi oho,
 edia rumā na haida ese bae ġigī dobi.
 Ena be rumā bae haginidia,
 to basie noholaidia;
 ena be vine imeadia bae hadodia,
 to anidia ranudia basie inu.

¹⁴ Iehova ena dina badana vada eme kahikahi,
 e kahira-kahiramu, e mai haraġamu;
 Iehova ena dina reġena mamina na idita,
 una dina ai goada-here a tauna baine tai
 lolololo.

¹⁵ Una dina na badu dinana,
 hisihisi bona lalo-hekwarahi dinana,
 hahevahu bona hahebua-tari dinana,
 dibura bona ġabora dinana,
 dagadaga bona dibura masemase dinana,
¹⁶ kibi reġena bona hone dinana,
 hanua mai maġudia bona kohoro ġaulatalatadia
 ihadikadia dinana.

¹⁷ Lau ese hisihisi baina mailaia taunimanima
 latadiae,
 bena bae raka, mata-kepulu taudia na hehetu,
 badina be Iehova vada e kara dika henia.

Raradia bae hebulu nege ġāhu na heto,
 bona hidiodia boromakau taġena na heto.

¹⁸ Edia silver eiava edia gold ese basie hamauridia
 diba,
 Iehova ena badu dinana ai.
 Ena badu ġaraġarana lahina ai,
 tanobada idoinai baine ara oho;
 badina be ia ese tanobada inoholaina taudia
 iboudiai
 baine ha-oredia taku, baine ha-oredia vaitani

2

Bese idau-idau iħabua-taridia

¹ Asi hemarai dibana besena e!
 A hegogo, emui hebou ta bavabia,
² do basie odamui oho
 lai ese uit momona e odaia ohomu na heto
 bona Iehova ena badu ġaraġarana na
 latamui ai do basine diho negana ai,
 Iehova ena badu dinana na
 emui ai do basine kau negana ai.
³ Umui tano taumui mai manaumui ida,
 ena haheġani o badinadiamu taumui,
 Iehova ba tahua!
 Kara maoromaoro ba tahua, Ialo-manau ba
 tahua;
 bena reana ba hehuni diba, Iehova ena badu
 dinana ai.
⁴ Badina be Gasa baine ġaġae,
 bona Askelono baine vahu;
 Asdod taudia na dina tubua ai bae luludia lasi,
 bona Ekron baine heraġa oho.
⁵ Kone taumui e, Kerete besena e,
 madi, iħabaimui!

Kanaan e, Filistia tanona e,
 Iehova ena hereva na latamu ai;
 lau ese do baina habuamu tari,
 ela bona inoholaimu tauna ta basine noho.

⁶ Oi danu, kone tanona e,
 rei gabudia ai do ba hahelao:
 mamoe iregudia taudia edia rei gabudia,
 bona mamoe seridia edia magu.

⁷ Kone tanona na Iuda besena kwabukwabudia
 ese bae gaunaia,
 unuseni ai edia mamoe bae ubudia.
 Hanuaboi bae hekure,
 Askelono rumadia ai.
 Badina be Iehova, edia Dirava, ese baine lalodia,
 bona baine hanamodia lou.

⁸ Moab taudia edia hegonañonalai
 bona Amono taudia edia heihi-ihirai
 vada na kamonai.
 Idia ese egu bese taudia vada e gonagonalaidia,
 bona edia tano iabi-ohona vada e herevalaia
 mai hekokorokudia ida.

⁹ Iehova Sabaota, Israel Diravana, na e tomu:
 Taunabunai, lau na maurimu hegeregerena
 Moab na Sodoma hegeregerena ai bainela,
 bona Amono taudia na Gomora hegeregerena
 ai bae hahelao,
 ava giniñini bona laguta tanodia ai baela,
 bae vahu ela bona hanaihanai.
 Egu orea taudia kwabukwabudia ese bae dadi-haidia;
 egu bese taudia kwabukwabudia ese bae
 gaunaidia.

¹⁰ Ahudia unu bae heto, edia hekokoroku davana;

badina be idia ese Iehova Sabaota ena orea
taudia na
e kirikirilaidiava bona latadai e heaġiva.

11 Iehova ese baine daġedaġe henidia;
oibe, ia ese tanobada diravadia iboudiai
baine hahitolodia;
bena bese idau-idau edia basileia iboudiai ese
ia bae toma henia diho,
ta ta ena gabu ena gabu ai.

12 Etiopia taumui e, umui danu;
egu dare ese baine alamui mamase.

13 Bena ia ese imana na mirigini kahana baine toi
roro henia,
Asuria baine habuaia tari;
Nineve danu baine havahua,
gabu kaukauna ai baine halaoa, tano ġaġaena
na heto.

14 Nani seridia na ia bogaraginai bae hekure,
bona uda boromadia idau-idau iboudiai
danu;
bogibada bona migu na
ena au-tubua lalodiae bae noho;
baimumu na ena gaba-mauru ai baine mu,
bona mukou danu ena raka-vareaina ai;
badina be ena sida audia igovalaidia bae
hekoki oho.

15 Hekokoroku hanuana binai,
e nohova mai namona ida;
sibona e tomava
“Lau o ina, idauna ta na lasi”.

Madi, vada e vahu vaitani,
uda boromadia edia gabu ai vada e hahelao.
E rakaia hanaimu taudia iboudiai ese

e si heniamu bona imadia e kahu kuboro-kuboro heniamu.

3

Ierusalem ihanamo-louna

- 1 Gwau-edede hanuana, vada e miro hanuana,
dağedağe hanuana, madi ihabaina!
- 2 Gado ta se kamonaimu,
sisiba ta se abia daemu,
Iehova se abidadama heniamu,
ena Dirava se raka henia kahimu.
- 3 Ena heitatao taudia ia lalonai na
e ġoumu leonadia na heheto;
ena hahemaoro taudia na tano-ġaġaena uda-sisiadia,
ġau ta basine mia rani.
- 4 Ena peroveta taudia na e gwau edeedemu,
idia na asi edia heabidadama;
ena hahelaġa taudia ese helāġa ġaudia e hamirodi-amu,
idia ese taravatu e dağedağe heniamu.
- 5 Ia lalonai Iehova na e kara maoromaoromu,
kara kerere ta ia ese se karaiamu.
Daba iboudiai ia ese ena hehamaoro ġoevaġoeva e
hahedinaraiamu,
daba matadia ta ta ai ia na se helalo reamu;
a kara gageva-gageva tauna na asi hemarai dibana.
- 6 Bese idau-idau vada na negedia daure,
edia maġu vada eme heġiġi dobi;
edia ariara vada na havahudia,
bena ta ese se raka-rakalaidiamu;
edia hanua iboudiai vada e hahevahu,

asi tauna ta lalodai; ta ese se noholaidiamu.
 7 Lau nato “Momokani, ia ese baine gari henigu,
 sisiba baine abia dae;
 lau ese vada na hadibadibalaidia ġaudia iboudiai
 na
 ia ese basine lalodia nege”;
 a idia na lalodia e ura dikadikamu
 lebulebu karadia mo bae kara e tomu.

8 Iehova na e tomu:
 Taunabunai, lau ba narigu;
 lau baina tore isi, baina hereva hedinarai,
 dinana ba nana.
 badina be lalogu vada na hadaia, bese idau-idau
 baina gogodia,
 basileia idau-idau danu baina haboudia,
 egu badu na idia latadiai baina bubua dobi totona,
 egu badu ġaraġarana idoinai.
 Badina be egu vägeġe baduna lahina ai
 tanobada idoinai baine heara oho.

9 Oibe, una negana ai bese idau-idau gadodia
 baina ha-idaudia,
 gado ġoева-daena ai baina halaodia;
 bena idia iboudiai ese Iehova ladana bae ha-
 hanea,
 bona ia isiaina bae lao hen i mai lalodia ta-
 mona ida.
 10 Etiopia sinavaidia unukahadia amo,
 ela bona gabu daudaudia mirigini kahana ai,
 idia ese herahia ġaudia na lauegu bae mailai.

11 Una dina ai ta ese basine hahemaraimu,
 o daġedäge henigu karadia daidiae;
 badina be una negana ai emu hetataro taudia na

- bogaragimu amo baina abidia oho.
 Bena oi na basio hekokoroku lou,
 egū ororo helağana ai.
- ¹² Badina be bogaragimu ai bese ta baina
 hanohoa,
 lalo-manau bona lalo-manada besena.
 Idia ese edia roho-mauri gabuna bae tahua,
 Iehova ladana ai.
- ¹³ Unu na Israel kwabukwabudia:
 kara dikana ta basie karaia,
 hereva koikoina ta basie gwauraia;
 bona ududia amo
 hereva koikoi basie lasi.
 Badina be idia na bae aniani, bae hekure nege,
 bona ta ese basine hagaridia.
- ¹⁴ Siona kekenimu e, ane avabia badabada!
 Israel e, a lolo!
 Ierusalem kekenimu e,
 ba moale, ba heimodai, mai lalomu idoinai!
- ¹⁵ Iehova ese ena hahemaoro herevadia na oi
 latamu amo vada e abia oho;
 ia ese oi inaimu vada e tahodia lasi.
 Iehova, Israel pavapavana, na bogaragimu ai;
 dika garina basio gari lou.
- ¹⁶ Una dina ai Ierusalem bae hereva henia, baeto:
 Siona e, basio gari;
 imamu ba ha-aukadia, basio manoka.
- ¹⁷ Iehova, emu Dirava, na bogaragimu ai,
 ia na tuari lohiana, kwalimu e henimu;
 ia ese baine moalelaimu mai moale-badana ida,
 ena lalokau ai ia ese baine hamatamatamu;
 ia ese baine heaǵilaimu mai ane lolona ida,
¹⁸ aria dinana ai na heto.
 Hahedika na oiemu amo baina abia oho,

una hahedika gwauna basio huaia helaorena.

19 A itaia, una negana ai e dağedağe henimumu
taudia iboudiai na
lau ese davadia baina henidia.

Ae-hedairike taudia na baina hamauridia,
bona e hakarohodia taudia na ma baina
haboudia;
edia hemarai na heimodai ai bona hari namo ai
baina halaoa,
tanobada idoinai latanai.

20 Una negana ai lau ese emui gabu korikori ai
baina hakaumui vareai,
emui noho ihanamo-louna na matamui amo
ba itaia negana ai.

Oibe, harimui baina habadaia, bona i'imodaimui
danu,
tanobada besedia iboudiai bogaragidiai,
emui noho ma baina hanamo lou negana ai.
Iehova na unu e gwau tomamu.

**Buk Baibel long tokples Motu
The Holy Bible in the Motu language of Papua New
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca